

**Pravila i procedure
Razvojno-garantnog fonda Brčko distrikta BiH za subvencionisanje dijela
kamata za kredite preduzećima, preduzetnicima i nosiocima
poljoprivrednih gazdinstava na području Brčko distrikta BiH
za 2016. godinu**

Na osnovu Programa subvencionisanja dijela kamata za kredite preduzećima, preduzetnicima i nosiocima poljoprivrednih gazdinstava na području Brčko distrikta BiH, broj: 13-002469/17 od 06.11.2017. godine i Akta Odjeljenja za privredni razvoj i kulturu, broj predmeta 13-003271/17 broj akta 13-1153PG-0002/17 od 04.12.2017. godine, a u skladu sa članom 15. Statuta Razvojno-garantnog fonda Brčko distrikta BiH, broj: 105/10 od 03.08.2010. godine, Odlukom o izmjeni Statuta Razvojno-garantnog fonda Brčko distrikta BiH, broj 235-2/12 od 19.10.2012. godine, Upravni odbor Razvojno-garantnog fonda Brčko distrikta BiH (u daljem tekstu: "RGFBD"), na svojoj 5.-oj sjednici, održanoj dana 11.12.2017. godine, donosi:

Pravila i procedure

Razvojno-Garantnog fonda Brčko distrikta BiH za subvencionisanje dijela kamata za kredite preduzećima, preduzetnicima i nosiocima poljoprivrednih gazdinstava na području Brčko distrikta BiH za 2016. godinu

Član 1

Ovim Pravilima i procedurama regulišu se: korisnici programa subvencionisanja dijela kamata, minimalni i maksimalni iznos kredita, namjena sredstava, rokovi otplate i visina subvencionisane kamatne stope, uslovi koje treba ispuniti korisnik, način podnošenja zahtjeva, procedura odobravanja i način isplate sredstava korisnicima programa.

Član 2

Korisnici programa subvencionisanja

(1) Pravo na korišćenje subvencije dijela kamata imaju privredni subjekti sa područja Brčko distrikta BiH koji:

- imaju sjedište preduzeća ili preduzetnika u Brčko distriktu BiH,
- su registrovani kao preduzeće ili preduzetnik, u skladu sa zakonima Brčko distrikta BiH,
- registrovanu djelatnost obavljaju na području Brčko distrikta BiH,
- sa 31.12.2016. godine imaju najmanje 50% od ukupnog broja zaposlenih lica sa prebivalištem u Distriktu ili su privredni subjekti sa sjedištem u Brčko distriktu BiH koji zapošljavaju više od 100 zaposlenih, od kojih najmanje 50 zaposlenih radnika tog privrednog subjekta ima prebivalište u Brčko distriktu BiH sa 31.12.2016. godine.

(2) Pravo na korišćenje subvencije dijela kamata imaju i fizička lica nosioci poljoprivrednih gazdinstava, koja imaju prebivalište u Brčko distriktu BiH i koja su upisana u Registar poljoprivrednih gazdinstava i Registar klijenata na području Brčko distrikta BiH.

(3) Pravo na korišćenje subvencije dijela kamata ne mogu ostvariti:

- banke niti druge finansijske organizacije i osiguravajuća društva koja su u skladu s Odlukom o klasifikaciji djelatnosti Brčko distrikta BiH upisane u području „K Finansijska djelatnost i djelatnost osiguranja“ u oblastima 64-66.,
- Privredni subjekti koji su u skladu sa Odlukom o klasifikaciji djelatnosti Brčko distrikta BiH upisani u područje "R djelatnosti kockanja i klađenja", oblast 92.00.,
- javna preduzeća,

- javne ustanove,
- Ustanove koje su registrovane u skladu sa Zakonom o visokom obrazovanju u Brčko distriktu BiH,
- Udruženja koja su registrovana u skladu sa Zakonom o udruženjima i fondacijama Brčko distrikta BiH i Zakona o mjesnim zajednicama u Brčko distriktu BiH.

Član 3

Minimalni i maksimalni iznos kredita

(1) Minimalan iznos kredita za preduzeća i preduzetnike iz oblasti 10-33 - prerađivačka industrija je 5.000,00 KM, a maksimalan iznos kredita za koji će se subvencionisati dio kamata je 1.500.000,00 KM. Izuzetno maksimalan iznos kredita za koji će se subvencionisati dio kamata može biti 3.000.000,00 KM, ukoliko ugovorena kamatna stopa iznosi do 5%.

(2) Za preduzeća i preduzetnike iz ostalih oblasti, minimalan iznos kredita za koji će se subvencionisati dio kamate je 5.000,00 KM, dok je maksimalni iznos kredita 250.000,00 KM. Izuzetno maksimalan iznos kredita za koji će se subvencionisati dio kamata može biti 500.000,00 KM, ukoliko ugovorena kamatna stopa iznosi do 5%.

(3) Bez obzira na iznos kredita i različite kamatne stope prilikom obračuna u obzir će se uzimati isključivo jedan od limita, koji je povoljniji za privrednika, s tim:

- a) ukoliko se koristi niži limit (1.500.000,00 KM iz oblasti prerađivačke industrije ili 250.000,00 KM za ostale oblasti) mogu se u obzir uzimati, odnosno sabirati krediti sa kamatnim stopama do i preko 5%;
- b) ako se koristi viši limit (3.000.000,00 KM iz oblasti prerađivačke industrije ili 500.000,00 KM za ostale oblasti) u obzir uzimati i sabirati samo kredite sa kamatnom stopom do 5%.

(4) U slučaju da korisnik subvencije dijela kamata na kredite realizuje kredit veći od 3.000.000,00 KM, odnosno veći od 500.000,00 KM, sa ugovorenom kamatnom stopom do 5% ili realizuje kredit veći od 1.500.000,00 KM, odnosno 250.000,00 KM, sa kamatnom stopom do 10%, „RGFBD“ subvencionisati će dio kamata na iznos kredita do navedenih iznosa, a za razliku preko ovih iznosa kredita neće se subvencionisati dio kamata.

(5) Ukoliko jedan privredni subjekat realizuje dva ili više kredita imaće pravo na subvencionisanje dijela kamata na zbir kredita koji ne prelazi iznos iz stavova (1) i (2) ovog člana.

Član 4

Subvencionisanje dijela kamata iz posebnog programa za poljoprivredu u Brčko distriktu BiH

(1) Minimalan iznos kredita za koji će se subvencionisati dio kamata za fizička lica nosioce poljoprivrednog gazdinstva je 3.000,00 KM, a maksimalan iznos kredita za koji će se subvencionisati dio kamata za fizička lica nosioce poljoprivrednog gazdinstva je 30.000,00 KM.

(2) Minimalan iznos kredita za koji će se subvencionisati dio kamata za pravna lica nosioce poljoprivrednog gazdinstva je 3.000,00 KM, a maksimalan iznos kredita za koji će se subvencionisati dio kamata za pravna lica nosioce poljoprivrednog gazdinstva je 50.000,00 KM.

(3) Subvencionisanje dijela kamata iz ovog člana ne isključuje niti umanjuje pravo na subvencionisanje dijela kamata iz člana 3 ovih Pravila i procedura.

Član 5

Namjena sredstava

(1) Subvencionisani dio kamate biće primjenjen na kredite odobrene za sve namjene, osim za one koji će biti korišćeni za nabavku putničkih i terenskih vozila, a koji ne služe za obavljanje registrovane djelatnosti.

(2) Subvencionosani dio kamata biće primjenjen i za nabavku osnovnih sredstava putem lizinga, osim lizinga za putnička i terenska vozila, koja ne služe za obavljanje registrovane djelatnosti.

(3) Kamata će se subvencionisati za kredite koji su odobreni putem svih banaka u Bosni i Hercegovini.

(4) Subvencionisaće se i dio troškova na ime plaćanja profitne marže od strane korisnika bankarskih sredstava prema bankama koje na takav način posluju. Trošak ne uključuje troškove obrade zahtjeva i troškove penala.

Član 6

Rok trajanja kredita i visina subvencionisane kamatne stope

(1) Subvencionisaće se dio kamata na odobrene kredite sa rokom otplate do deset (10) godina i kamatnom stopom do 10%, a u skladu sa odedbama člana 3 ovih Pravila i procedura.

(2) Procenat subvencionisanog dijela kamata za odobrene kredite dobije se tako što se iznos odobrenih sredstava u Budžetu za 2017. godinu, umanjen za iznos neisplaćenih kamata po Programu iz 2014. godine, stavi u odnos sa ukupno uplaćenim iznosom kamate po kreditima u 2016. godini dobijenim nakon prikupljenih i obrađenih zahtjeva za 2016. godinu.

(3) Maksimalni iznos subvencionisanog dijela kamata za odobrene kredite koji jedan privredni subjekt može dobiti iznosi 70.000,00 KM.

(4) Pravo na subvencionisanje dijela kamata imaju preduzeća, preduzetnici i fizička lica nosioci poljoprivrednih gazdinstava, koji imaju prebivalište u Brčko distriktu BiH i koji su upisani u Registar poljoprivrednih gazdinstava i Registar klijenata na području Brčko distrikta BiH, na kredite čiji anuiteti dopijevaju u 2016. godini, pod uslovom da su uredno vraćali kredite u prethodnom periodu.

Član 7

Uslovi koje treba da ispuni korisnik

(1) Uslove koje treba ispuniti korisnik iz člana 2 stava (1) su:

- a) Da je registrovan u Osnovnom sudu Brčko distrikta BiH,
- b) Da vrši namjensko ulaganje sredstava na području Brčko distrikta BiH,
- c) Da preduzeće ili preduzetnik nije pod stečajem ili likvidacijom, odnosno da nije predmet postupka za proglašenje stečaja ili likvidacije,
- d) da dostavi dokaze o izmirenju obaveza, sa stanjem ne starijim od devedeset (90) dana od dana podnošenja zahtjeva, koji se odnose na izmirenje obaveza po osnovu poreza prema Brčko distriktu BiH koje izdaje Direkcija za finansije Brčko distrikta BiH, dokaz o izmirenim obavezama na ime zdravstvenog osiguranja koji izdaje Fond zdravstvenog osiguranja Brčko distrikta BiH, te dokaze o izmirenim obavezama po osnovu Fonda PIO RS i Fonda PIO/MIO Federacije BiH, izdatim od nadležnih institucija,
- e) Da 31.12.2016. godine imaju najmanje 50% lica sa prebivalištem u Distriktu, od ukupnog broja zaposlenih lica ili da 31.12.2016. godine zapošljava više od 100 zaposlenih radnika, od kojih najmanje 50 zaposlenih imaju prebivalište u Brčko distriktu BiH.

(2) Uslovi koje treba da ispuni korisnik iz člana 2 stava (2) su:

- a) Da je upisan u Registar poljoprivrednih gazdinstava i Registar klijenata na području Brčko distrikta BiH,
- b) Da je kredit, koji je predmet subvencionisanja dijela kamate, realizovan u skladu sa odredbama Odluke o plasiranju novčanih sredstava kroz kreditne linije radi razvoja poljoprivrede na području Brčko distrikta BiH.

Član 8

Javni poziv

(1) Razvojno-garantni fond Brčko distrikta BiH će raspisati javni poziv za podnošenje zahtjeva za subvencionisanje dijela kamata za kredite preduzećima, preduzetnicima i nosiocima poljoprivrednih gazdinstava na području Brčko distrikta BiH za 2016. godinu.

(2) Javni poziv biće otvoren od dana objavljivanja do 31.01.2018. godine i biće objavljen na web stranici "RGFBD".

Član 9

Način podnošenja Zahtjeva

(1) Zahtjevi za subvencionisanje dijela kamate (profitne marže) podnose se Razvojno-garantnom fondu Brčko distrikta BiH u pismenoj formi na obrascima Razvojno-garantnog fonda Brčko distrikta BiH

(2) Obrasci zahtjeva za subvencionisanje dijela kamata (profitne marže) po Programu Vlade Brčko distrikta BiH za 2016. godinu dostupni su na web stranici "RGFBD" i mogu se lično preuzeti i u prostorijama "RGFBD".

Član 10

Potrebna dokumentacija za preduzeća ili preduzetnike

(1) Preduzeća ili preduzetnici uz zahtjeve prilažu slijedeća dokumenta:

- a) Potvrda banke o redovnoj otplati kredita sa pregledom obračunatih i naplaćenih kamata (analitička kartica) za period za koji se vrši subvencija dijela kamate,
- b) Ugovor o kreditu,
- c) Izvod iz sudskog registra, ne stariji od 90 dana od dana podnošenja zahtjeva,
- d) Obavještenje o razvrstavanju poslovnog i drugog subjekta prema djelatnosti,
- e) Dokaz o izmirenim obavezama po osnovu poreza prema Brčko distriktu BiH koji izdaje Direkcija za finansije Brčko distrikta BiH, sa stanjem ne starijim od 90 dana od dana podnošenja zahtjeva,
- f) Dokaz o izmirenim obavezama na ime zdravstvenog osiguranja koji izdaje Fond zdravstvenog osiguranja Brčko distrikta BiH, sa stanjem ne starijim od 90 dana od dana podnošenja zahtjeva,
- g) Dokaz o izmirenim obavezama po osnovu Fonda PIO RS izdat od nadležne institucije, sa stanjem ne starijim od 90 dana od dana podnošenja zahtjeva,
- h) Dokaz o izmirenim obavezama po osnovu Fonda PIO/MIO Federacije BiH izdat od nadležne institucije, sa stanjem ne starijim od 90 dana od dana podnošenja zahtjeva,
- i) Obrazac MIP 1023 za 12 mjesec 2016. godine i za SP specifikaciju o uplati doprinosa za 12 mjesec 2016. godine (obrazac 2002).

(2) Sva dokumenta iz stava (1) ovog člana se dostavljaju u originalu ili ovjerena fotokopija.

Član 11

Potrebna dokumentacija za fizička lica nosioce poljoprivrednih gazdinstava

(1) Fizička lica nosioci poljoprivrednih gazdinstava uz zahtjev prilažu slijedeća dokumenta:

- a) Potvrda banke o redovnoj otplati kredita sa pregledom obračunatih i naplaćenih kamata (analitička kartica) za period za koji se vrši subvencija dijela kamate, original ili ovjerena kopija;

(2) „RGFBD“ će kod nadležnog Odjeljenja izvršiti provjeru da li je podnosilac zahtjeva upisan u Registar poljoprivrednih gazdinstava i Registar klijenata na području Brčko distrikta.

- (3) „RGFBD“ će izvršiti uvid u arhivu „RGFBD“ vezano za Ugovore o kreditima zaključenim između podnosioca zahtjeva i banaka, koji moraju biti realizovani u skladu sa odredbama Odluke o plasiranju novčanih sredstava kroz kreditne linije s ciljem razvoja poljoprivrede na području Brčko distrikta BiH.

Član 12

Procedura odobravanja

- (1) Svi podnešeni zahtjevi će po redoslijedu prijema od strane „RGFBD“ biti upisani u posebnu knjigu ulaza i istim redoslijedom će biti razmatrani od strane Upravnog odbora „RGFBD“.
- (2) Direktor „RGFBD“ vrši analizu prispjelih zahtjeva (u smislu ispunjavanja traženih uslova i ispravnosti podnešene dokumentacije) i konstatuje ukupan iznos uplaćene kamate.
- (3) Nakon utvrđivanja iznosa uplaćene kamate izračunava se procenat subvencionisanog dijela kamata u skladu sa članom 6 stav (2) ovih pravila i procedura.
- (4) Direktor „RGFBD“ predlaže Upravnom odboru donošenje odluka o odobravanju ili neodobravanju po zahtjevima.
- (5) Ako korisnik kredita dostavi više ugovora o kreditu kojima ukupan zbir prelazi 250.000,00 KM odnosno 500.000,00 KM i 1.500.000,00 KM odnosno 3.000.000,00 KM, za obračun subvencionisanog dijela kamate će se koristiti proporcionalni metod.
- (6) Upravni odbor „RGFBD“ razmatra prijedlog Direktora (uz svu predočenu dokumentaciju po zahtjevu) i donosi odluke o odobravanju ili neodobravanju subvencije.
- (7) Rok za obradu svih podnešenih zahtjeva je trideset (30) dana od dana zatvaranja Javnog poziva.
- (8) Odluka Upravnog odbora „RGFBD“ o odobravanju ili neodobravanju subvencije dostavlja se podnosiocu zahtjeva, a jedan primjerak se arhivira sa predmetom u „RGFBD“.

Član 13

Pravo žalbe

- (1) Podnosilac zahtjeva ima pravo da u roku od pet (5) dana od dana prijema odluke podnese žalbu na odluku Upravnog odbora „RGFBD“.
- (2) Žalba se podnosi pismenim putem Komisiji za žalbe „RGFBD“.
- (3) Sastav Komisije za žalbe „RGFBD“ čine: predstavnik „RGFBD“ i predstavnici Odjeljenja za privredni razvoj, sport i kulturu i Odjeljenja za poljoprivredu, šumarstvo i vodoprivredu.
- (4) Komisija za žalbe „RGFBD“ će razmotriti prispjelu žalbu i o tome pismeno obavijestiti podnosioca zahtjeva.

Član 14

Način isplate sredstava korisnicima programa

Po konačnosti odluke o odobravanju subvencije dijela kamata, „RGFBD“ će u roku od deset (10) dana izvršiti uplatu odobrenog iznosa na račun podnosioca zahtjeva.

Član 15
Troškovi provizije

Troškovi provizije nastali prenosom sredstava na račune korisnika sredstava po osnovu Programa subvencionisanja dijela kamata priznaju se na teret rashoda "RGFBD".

Član 16
Stupanje na snagu

Ova pravila i procedure stupaju na snagu danom donošenja i biće objavljen na oglasnoj tabli i web stranici "RGFBD".

Predsjednik
Upravnog odbora:

Broj: 144/17
Brčko, 18.12.2017. godine

Miralem Kovačević, dipl.oec.